

NO. SOALAN: 120

**PEMBERITAHUAN PERTANYAAN BAGI JAWAB LISAN
DEWAN RAKYAT**

PERTANYAAN : JAWAB LISAN

**DARIPADA : DATO' SRI LIOW TIONG LAI
[BENTONG]**

TARIKH : 18 JUN 2014

RUJUKAN : 6912

SOALAN:

Dato' Sri Liow Tiong Lai [Bentong] minta **MENTERI DALAM NEGERI** menyatakan tindakan yang diambil bagi membantu syarikat dan peniaga yang memerlukan pekerja asing beroperasi dan adakah kemasukan pekerja asing yang baru akan dibenarkan untuk semua sektor kritikal.

JAWAPAN:

Tuan Yang di-Pertua,

Kerajaan sentiasa peka terhadap keperluan syarikat dan peniaga yang memerlukan pekerja asing untuk beroperasi. Sehubungan ini, Kerajaan telah membenarkan pengambilan pekerja asing bagi lima sektor utama yang memerlukan guna tenaga asing iaitu sektor pembinaan, perkilangan, perkhidmatan, perladangan dan juga pertanian bagi membantu syarikat dan peniaga untuk menjalankan operasi perniagaan.

Kerajaan juga telah menubuhkan Pusat Kelulusan Setempat (One Stop Centre – OSC) pada 1 Ogos 2005 bagi memudahkan majikan daripada pelbagai sektor membuat permohonan pengambilan pekerja asing. Permohonan majikan yang lengkap dan menepati kriteria serta syarat yang ditetapkan akan diberikan kelulusan pada hari yang sama.

Bagaimanapun, keperluan pekerja asing bagi sektor kritikal perlu disalurkan kepada Agensi Kawal Selia setiap sektor selaku agensi yang bertanggungjawab dalam memantau keperluan sebenar guna tenaga kerja termasuk pekerja asing di sektor masing-masing. Ini termasuklah sekiranya sektor kritikal tersebut adalah sektor beku dan sektor luar dasar.

Walaupun terdapat keperluan mendesak, syarikat dan majikan seringkali diingatkan mengenai aspek keselamatan yang perlu diberi keutamaan memandangkan kehadiran pekerja asing di negara ini akan turut memberi impak terhadap ketenteraman awam, kesihatan, sosial dan ekonomi.

SULIT

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEDUA,
PARLIMEN KETIGA BELAS**

PERTANYAAN : LISAN

**DARIPADA : DATO' AHMAD FAUZI BIN ZAHARI
[SETIAWANGSA - BN]**

TARIKH : 18 JUN 2014 (RABU)

SOALAN (NO. 121)

Minta **MENTERI BELIA DAN SUKAN** menyatakan langkah jangka panjang yang dirancang oleh pihak Kementerian bagi mengatasi masalah keganasan bola sepak yang melibatkan kekecohan sesama penyokong bola sepak dan juga sesama pemain dan jurulatih yang kerap kali berlaku kebelakangan ini.

JAWAPAN

Yang di-Pertua,

1. Untuk makluman Ahli Yang Berhormat, antara langkah-langkah untuk mengatasi masalah keganasan bola sepak yang sering berlaku sejak kebelakangan ini, Persatuan Bola Sepak Malaysia (FAM) telah melancarkan kempen anti keganasan iaitu '*'Love Football, Stop Hooliganism'*' pada 22 Februari 2014 oleh Timbalan Presiden Persatuan Bola Sepak Malaysia (FAM). Ini merupakan kempen berterusan dalam menyedarkan peminat bola sepak agar lebih berhemah dalam memberi sokongan kepada pasukan masing-masing.
2. Selain daripada itu, Jawatankuasa Keselamatan yang ditubuhkan oleh FAM telah bekerjasama dengan Polis DiRaja Malaysia (PDRM) bagi meningkatkan lagi kawalan keselamatan sebelum dan selepas perlawanan. Dalam memastikan keselamatan penonton, kawalan keselamatan di dalam dan di luar stadium turut diperketatkan dengan menyenaraikan barang-barang larangan seperti suar dan juga batang bendera tidak dibenarkan dibawa masuk ke dalam stadium.
3. Persatuan Bolasepak Malaysia (FAM) turut telah mengenakan hukuman yang berat ke atas mana-mana pasukan yang gagal mengawal penyokong masing-masing. Kes terbaru di mana FAM telah mengenakan hukuman denda sehingga RM 140,000.00 dan bermain di stadium kosong sebanyak empat perlawanan ke atas

SULIT

pasukan bolasepak negeri Perak kerana kejadian membakar suar,
mercun dan kelakuan agresif penyokongnya ketika menentang
Johor DT dan Selangor.

Sekian, terima kasih.